

20/10/2025

AKASHVANI AIZAWL

18:30 Hrs

REGIONAL NEWS

HEADLINES:-

1. Dampa assembly bye-election atan PC candidate atan an party vice president Pu K. Zahmingthanga an ruat a, kil 5 atangin inchuh a ni dawn ta.
2. Excise & Narcotics Department chhinchhiah danin kumin January ni 1 atanga October ni 16 thleng khan Mizoramah ruihhlo vangin mi 73 an thi tawh.
3. Prime Minister Narendra Modia chuan vawiin khan Indian Navy te nen INS Vikrant indo lawnglianah Diwali an hmang.
4. Bihar Assembly inthlan thawh hnihna atana nomination pekluh hun chu vawiin khan a tawp.

<><><>

DAMPA BYE-POLL

Dampa assembly bial hun laklawha inthlanna atan PC party chuan an candidate tur chu an party vice president Pu K. Zahmingthanga, Aizawl Sakawrtuichhun veng a nih thu vawiin khan an puang.

People's Conference (PC) party president Pu Vanlaluata'n Akashvani Aizawl a hrilh danin Dampa assembly bial bye-election hi an party chuan chuh an tum a. An candidate tur hi vawiin khan an party secretary Pu RC Rohmingthanga'n a puang a. Naktuk hian he inthlanna a returning officer hnenah Pu K. Zahmingthanga hian a nomination a theh lut dawn a ni. PC Party-in an chuh ve dawn takah chuan Dampa bial bye-election chuhtu hi mi 5 an awm dawn ta a. Bhartiya Janata Party (BJP), Congress, MNF leh rorellai ZPM-te chuan an candidate tur an puan tawh bakah an candidate-te hian chuh turin an hming an pelut vek tawh a. He tih lai hian independent a ding tur an awm awm thawm hriat a ni lo.

BJP chuan kum 2023 a he lai biala Congress candidate, tunhnai a an party zawmtu Pu Lalhmingthanga chu an vawrh a, Congress chuan Minister hlui Pu John Rotluangliana an candidate a. MNF chuan an party senior vice president leh Minister hlui Dr. R. Lalthangliana dintirin ZPM atangin kum 2023 inthlana tling zo tawh lo Pu Vanlalsailova an din nawn tir leh bawk a. Candidate leh party hrang hrangte hian vote zawn beihpui an thlak mek a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.

<><><>

TRUCKERS

Mizoram Tipper Association, District Headquarter's, Kolasib leh Joints Action Committee te chuan tunkar Ningani zing dar 7 atanga Pathiani tlai dar 4 thleng Vairengte - Sairang leh Bairabi - Kolasib inkar kawng an dang dawn.

National Highway 306 leh 06 kawngpui enkawltu NHIDCL leh Mizoram sorkar chu tun aia chak zawka kawng chhe lai thawm tha turin pawl pahnihte hian an phut bawk. Pawl pahnihte hian vawiin khan thuchhuah an siam a, Mizoam chak lakna kawngpui Vairengte - Sairang leh Bairabi -

Kolasib inkar kawng khwar laite hnawh hna leh thawmthat hna thawh mek ni mah se, an hnathawh a chak tawk lo hle a, tun anga an thawh reng chuan Mizoram kawngpui pawimawh hi kumin mai pawh ni lo, nakum fur hma pawhin an siam zawh a rinawm loh thu leh nakumah phei chuan tun aia a chhiat nasat zawk an rin thu an tarlang a ni.

NHIDCL leh Mizoram sawrkar chu tun aia chak zawka kawng siam hna thawk tur te, sub-grade atanga siam tur leh thawk ngei turinte MTA Kolasib leh JAC chuan an phut a. Hna chak taka an thawh theih na'n leh kawngpui pawimawh tak mai an ngaihthah em avangin lirtheia eizawng ten lungawi lohna lantir na'n October ni 23 zing dar 7 atanga October 26 tlai dar 5 thleng Vairengte leh Sairang inkar kawngpui leh Bairabi leh Kolasib inkar kawng hi an dan dawn thu tarlangin, Kawnpui leh Durtlang inkar kawngah lirthei eng chi mah tlan lo turin an ngen a ni.

MTA Kolasib leh JAC chuan kawngpui tha an duh avanga an nawrhna chu Mizoram mipui tana tha zawk tur a nih thu an tarlang a; an hmalakna thlawp tlat turin mipui an ngen.

Kawng dan chung hian ambulance, magistrate, emergency duty-te leh tul bik thila mahni awmna veng VC/ YMA hriatpuina lehkha neite chu hriatthiam an nih dawn thu an tarlang baw.

<><><>

MUHCS

Mizoram Universal Health Care Scheme (MUHCS) atan July leh September thla inkar chung khan finance department-in cheng vaibelchhe 35 a pe chhuak.

MUHCS kalpuitu damdawi-in te'n he ruahmanna hnuiaia inziaklut damlo an enkawlna senso phuhruk na'n July - September thla inkar chung khan Finance department chuan Mizoram State Healthcare Society (MSHCS) hnenah cheng vaibelchhe 35 a pechhuak a. Pawisa hi Mizoram chhunga MUHCS kalpuitu damdawi-inte hnenah an pe tawh. MSHCS hotute chuan Akashvani Aizawl zawhna chhangin, July - September quarter atan khan Finance department-ah MUHCS kalpuitu damdawiinten damlo an enkawlna senso tura ruahman (proposal) cheng vaibelchhe 35 an thehluh thu an sawi a. Finance department hian cheng vaibelchhe 35 hi corpus fund atangin MSHCS hnenah July ni 15 khan cheng vaibelchhe 10 an pe a, August ni 4-ah vaibelchhe 15 leh September ni 23-ah vaibelchhe 10 an pe leh tih an sawi.

Cheng vaibelchhe 35 hi sorkar damdawiin 77 leh MUHCS kalpuitu empanelled mimal enkawl damdawi-in 20 bakah, emergency-a non-empanelled hospital-a in admit mi 699-te enkawlna senso atan an pek thu MSHCS hotute chuan an sawi a ni.

MSHCS hotute chuan October - December quarter atan Finance department-ah proposal cheng vaibelchhe 60 an thehluh thu leh Finance department atang hian tun quarter atan pawisa dawn la nei lo mah se, buaipui mek a nih thu erawh an dawng tih an sawi a. Empanelled hospital-te hi khum an neih zat atangin pawisa an mamawh tur hi chhût a nih thu leh empanelled an awm belh chuan pawisa hi an la mamawh belh dawn thu an sawi baw.

<><><>

DRUG RELATED DEATHS

Excise & Narcotics Department chhinchhiah danin kumin January ni 1 atanga October ni 16 thleng khan Mizoramah ruihhlo vangin mi 73 an thi tawh.

Hemi hun chhunga ruihhlo vanga thi zinga mi 27 hi heroin vanga thi an ni a. Excise & Narcotics Department-in a chhinchhiah chinah kumin January 1 atanga kar kalta Ningani thlenga ruihhlo vanga thi mi 73 hi kum 19 - 57 inkara upa an ni a; mipa 61 leh hmeichhia 12 an ni. Ruihhlo vanga thi mi 73 zinga 27 hi heroin ti thin niin, a bak mi 46-te hi ruihhlo chi khat aia tam tihpawlh thinte an ni. Excise & Narcotics Department hian Mizorama ruihhlo vanga thi zat hi kum 1984 atang khan a chhinchhiah tan a, kumin October ni 16 thleng khan kum 42 chhungin ruihhlo vanga thi mi 1,952 an awm a, mipa 1,714 leh hmeichhia 238 an ni. Kum 42 chhunga ruihhlo vanga thi mi 1,952 te zingah hian spasmo proxyvon emaw parvon spa emaw hmang thin mi 1,161, heroin ti thin mi 299 leh ruihhlo chi khat aia tam tihpawlh thin mi 492 an ni.

<><><>

FORENSICS

Home department hnuai Mizoram Forensic Science Laboratory (MFSL) chuan kumin hian January ni 1 atanga September ni 30 thleng khan thubuai 1,077-ah thil chi hrang hrang 8,561 an endik tawh.

Mizoram FSL hian kum 26 chhungin thubuai hrang hrang 16,309-ah pawikhawihna thleng kaihnawih thil chi hrang nuai 1, sing 8, sang 3 leh 568 an endik tawh a. FSL hotute hnen atanga Akashvani Aizawl thudawn danin, Forensic mithiamte chuan pawikhawihna hmunte endikin finfiahna awm theite an la khawm thin a. Court, Police, Excise & Narcotics leh department hrang hrang atanga endik tura tihte leh, Mizoram pawn atanga thubuai kaihnawih rawn thawnte an endik thin. Tunah hian kutze thla (fingerprint) 10,920 an chhinchhiah tawh a ni.

FSL-ah hian director ho-in forensic expert 14 leh thawktu dang 31 awmin, an vaiin mi 45 an ni a. Division hrang hrang - Chemistry (Drugs & Narcotics), Questioned Documents, Ballistics & Toolmarks, Fingerprint, DNA, Toxicology, Photography leh Cyber Forensic-te a awm.

Mizoram Forensic Science Laboratory hi kum 1998 khan CID (Crime) hnuai branch pakhat anga din niin, July ni 31, 2000 khan Police Headquarters hnuai dah a ni a. March ni 13, 2015 khan Home department hnuai directorate puitlingah hlan kai a ni.

<><><>

DRUGS, LIQUOR SEIZURE

Champhaia Excise & Narcotics Department mi leh sate chuan kum khat leh thla 9 chhungin zu leh ruihhlo kaihnawihah thubuai 636 an ziahlut a, mi 556 an man tawh.

Champhai district Excise & Narcotics Department mi leh sate'n kum 2024 kum tluana ruihhlo kaihnawih thubuai an ziahlut leh mihring an man zat aiin kumin thla 9 chhunga thubuai an ziahlut leh mi an man zat hi a tam tawh zawk a. Excise & Narcotics Minister Pu Lalnghinglova Hmar-in kar kalta Inrinni a Champhai Circuit House-a chanchinbumite a kawmna-ah, kum 2024 kum tluan leh kumin January atanga September thla thleng khan Champhai Excise duty-te chuan zu leh ruihhlo kaihnawihah thubuai 636 an ziahlut thu leh mihring 556 an man thu a tarlang a. Kum 2024 chhung khan Champhai Excise-te hian ruihhlo kaihnawihah mi 95 an man laiin kuminah thla 9 chhungin mi 112 an

man tawh a, Narcotic Drugs & Psychotropic Substances Act, 1985 hmanga nikuma thubuai 71 an ziahluh lain kuminah thubuai 87 an ziaklut tawh a ni.

Nikum chhung khan Champhai Excise & Narcotics Department hnathawkte hian zu kaihnawihah thubuai 304 an zia lut a; kuminah 174 ziahluh tawh niin, nikum khan mi 220 an man a, kuminah mi 129 an man tawh bawk.

Champhai Excise & narcotics duty-te hian nikum khan heroin kg 8 leh gram 783 leh meth kg 86 leh gram 835 an man a, kuminah hian January leh September thla inkar chhung khan heroin kg 12 leh gram 616 leh meth kg 87 leh gram 639 man tawhin, nikuma an man zat aiin kumin thla 9 chhunga heroin leh methamphetamine an man zat hi a tam tawh zawk bawk a ni.

Kumin hian Champhai Excise duty-te hian sap zu (IMFL) um puitling 1,012 an man tawh a, nikum khan um 733 manin, kumin thla 9 chhunga sap zu an man zat hi nikuma an man zat aiin um 279-in a tam tawh zawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Indian Navy te nen INS Vikrant indo lawnglianah Diwali an hmang. He hunah hian thusawiin Pu Modia chuan Operation Sindoor ah khan ramchhunga sipai chi thumte thawhhona felfai tak avangin hun reiloteah Pakistan a tlawm a ni a ti a. Pu Modia chuan India siam chhuah indo lawnglian hmasa ber INS Vikrant chuan India sipaite thiehna a pholang a ni a ti bawk.

<><><>

DIWALI

Vawiin Diwali pualin President Droupadi Murmu, Vice President C P Radhakrishnan leh Prime Minister Narendra Modia te chuan ramchhung mipuite duhsakna an hlan. President Murmui chuan he kut hi hlimna kut anih thu sawiin mahni inenlet nan leh hmasawanna tur kut anih thu sawiin in unauna leh inngainatna thlen se a duh thu a sawi.

Vice President Radhakrishnan pawhin mipuiten malsawmna tam tak an dawn a duhsak thu a sawi. Prime Minister Narendra Modia chuan mipuite Diwali chibai bukin he eng kut hian mipuite nunah harhtharna thlen se a duh thu a sawi a. Ralmuanna, hlimna leh hausakna mitin nunah lo thleng se rampumah thil tha lam lo thleng zel se a duh thu a sawi a ni.

<><><>

BIHAR ELECTION

Bihar Assembly inthlan thawh hnihna atana nomination pekluh hun chu vawiin khan a tawp. Assembly bial 243 zinga 122 ah inthlan thawh hnihna hi neih a ni dawn a. Thlan thar November ni 11 ah district 20 ah vote thlak a ni ang. Hriat theih chinah inthlan thawh hnhnaah hian nomination paper 1066 a lut tawh a ni.

Vawiin vek khan inthlan thawh khatna chuh tumte tana inhnudawh theih hun khar a ni a. Inthlan thawh khatnaah hian Assembly bial 121 ah inthlanna neih a ni dawn a. Bihar Chief Electoral Officer sawidanin nomination thehluh zingah 1375 pawm a ni a. Hneg zingah hian hmeichhia 147 an awm a ni.

<><><>